

DOMENIE VIII «VIE PAL AN»

Antifone di jentrade cf. Sal 17,19-20

Mi à tignût sù il Signôr,
mi à liberât e puartât te largjure,
parcè che mi vûl ben, mi à salvât.

Colete

Diu onipotent, danus par plasê la gracie
che il cors dal mont al ledi indenant seont il to progetto di pâs,
e la tô Glesie e puedi servîti contente e cence pôris.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Sir 27,4-7

No sta dî ben di un prin di vêlu viodût a resonâ.

Dal libri dal Fi di Sirac
Scjassant il tamê al reste il patûs,
cuistionant cuntun a vegnin fûr i difiets.
Il for al rifiñis i creps dal vasâr,
cussì il resonament al palese il naturâl di un om.
De pome si presee chel che al tire sù l'arbul,
cussì dal mût di fevelâ il profont dal om.
No sta dî ben di un prin di vêlu viodût a resonâ;
dome li e je la prove di trop che al vâl.
Peraule di Diu.

SALM RESPONSORIAL dal Salm 91

R. Al è biel cjantâ il to non, Signôr.

Al è biel laudâ il Signôr,
contant il to boncûr a buinore
e la tô fedeltât gnot vie.
Parcè che tu mi âs jemplât di gjonde, Signôr, cu lis tôs voris,
lis voris des tôs mans jo me gjolt a cjalâ. **R.**

I juscj a florissin come palmis,
a vegnin sù come i cedris dal Liban;
riplantâts te cjase dal Signôr,
a florissin tai andits dal nestri Diu. **R.**

A butaran parfin te lôr vecjae,
a restaran frescs e vivarôs,
par contâ che il Signôr al è just, la mê crete,
e che in lui no 'nd è ombre di injustizie. **R.**

SECONDE LETURE 1 Cor 15,54-58

Nus à dât la vitorie midiant dal Signôr nestri Jesù Crist.

De prime letare di san Pauli apuestul ai Corints
Fradis, cuant che chest cuarp che si fraidès si sarà rivistût di incorutibilitât, e chest cuarp mortâl si sarà rivistût di imortalitat, in chê volte si colmarà la peraule de Scriture: “La muart e je stade glotude de vitorie. Dulà ise, muart, la tô vitorie? Dulà isal, muart, il to asel?”.

L'asel de muart al è il pecjât, e la fuarce dal pecjât e je la leç. Che al sedi ringraciât Diu che nus dà la vitorie midiant dal Signôr nestri Jesù Crist! Par chel, fradis miei tant cjârs restait salts, no stait a molâ, dait sot plui che o podêts te vore dal Signôr, savint che denant dal Signôr no lavorais mai dibant.

Peraule di Diu.

CJANT AL VANZELI cf. At 16,14

R. Aleluia, aleluia.

Vierzinus, Signôr, il nestri cûr
e o rivarìn a capî lis peraulis di to Fi.

R. Aleluia.

VANZELI Lc 6,39-45

Cu la bocje si pant dut ce che si à tal cûr.

Dal vanzeli seont Luche

In chê volte, Jesù al disè ai siei dissepui une parabule: «Puedial un vuarp menâ ator un altri vuarp? No colaresino ducj i doi intune buse? Il dissepul nol è plui grant dal so mestri; par dâle dute, se si sarà lassât tirâ sù ben, al sarà compagn dal mestri. Parcè mo cjalistu il fros che al è tal voli di to fradi e no ti inacuarzistu dal trâf che al è tal to? Cemût puedistu dîi a to fradi: Lasse che ti tiri vie il fros che tu âs tal voli, cu la cuâl che no tu viodis il trâf che tu âs tal to? Fals! Prime tire vie il trâf che al è tal to voli e alore tu viodarâs ben tal tirâ vie il fros dal voli di to fradi.

L'arbul bon nol fâs pomis tristis e nancje un arbul trist nol fâs pomis buinis. La virtût di un arbul si ricognossile des sôs pomis: di fat no si cjape sù fîcs des spinis e no si vendeme ue di un baraçâr. L'om bon al tire fûr il ben dal bon tesaur dal so cûr; l'om trist, invezit, al tire fûr il mât dal so trist tesaur. Di fat cu la bocje si pant dut ce che si à tal cûr».

Peraule dal Signôr.

Su lis ufiertis

Diu, che tu nus dâs ce che nô o ufrin al to non
e tu metis l'ufierte in cont dal nestri servizi e suditanse,
o suplichin il to boncûr
che al deventi par nô un premi
ce che par tô bontât al ven segnât a nestri merit.
Par Crist nestri Signôr.

Antifone a la comunion cf. Sal 12,6

I cijantarai al Signôr che mi à judât,
o vuei laudâ il non dal Signôr, l'Altissim.

Daspò de comunion

Daspò di vénus sostentâts cul to regâl che al salve,
o prein, Signôr, il to boncûr:
par che, cun chest sacrament che tu nus nudrissis tal timp,
tu nus fasis vê part de vite eterne.
Par Crist nestri Signôr.